



1. marts 2024

UPA 2024/101

Inatsisartut ingerlatsinermut maleruagassaani § 33 tungavigalugu isummerfigisassatut matumuuna siunnersuutigineqarpoq:

Inatsisartunut isummerfigisassatut siunnersuut, Naalakkersuisut peqquneqassasut malittarisassanik pilersitseqqullugit, inuussutissarsiutinut ilinniarfinni ingerlariaqqiffinnilu ilinniartunut periarfissaalissasoq misilitseqqinnissaq karakterit qaffassarnissaat siunertaralugu.

(Inatsisartunut ilaasorta q Nivi Olsen, Demokraatit)

Tungavilersuut

Misilitsinneq amerlasuunut artornartarpoq. Karakterilunnerlu tamatigut piareersarluarsimanginnermik piginnaasakinnermilluunniit tamatigut peqquteqarneq ajorpoq. Karakterilunneq pissuteqarsinnaavoq aamma soorlu annilaanganermik ajutoornermilluunniit.

Ullumikkut malittarisassat imaapput, angusingittooraanni, misilitseqqinnissaq periarfissaalluni. Taamaapportaaq, napparsimaleraanni imaluunniit takkutinnngittuussimagaanni.

Akerlianilli misilitseqqittoqarsinnaanngilaq, angusisimagaanni pitsaanngitsunik karaktereqarluni. Tamanna allanngorterussuppara.

Isumaqarpunga, periarfissaqartariaqartoq misilitseqqinnissaq, karakteri naammaginngikkaanni, ilinniartut periarfissinneqarluni inaarutaasumik allagartap pitsanngorsarnissaanut nammineerlunilu qulakkeerneqassamat, sapinngisaq tamaat inaarutaasumik allagartartaarnissaq anguniarneqarsimasoq.

Ilinniarfeqarfiimmi angusingittoortunut napparsimasimasunullu neqeroorutigisussaammassuk misilitseqqinnissaq, taamaaliorneq suliakkersuutaasinnaanngilaq ilinniartunut misilitseqqinnissamik neqerooruteqarnissaq, karakteriminnik pitsanngorsaanissamat kissaateqartunut.

Taamatut oqareerlunga qilanaaraara, Naalakkersuisut partiillu allat siunnersuutinnut qanoq isumaqarnerat tusassallugu neriuutigalugulu amerlanerussuteqartunit isumaqatigineqassasoq.

Pisortanut aningaasaqarnikkut allaffissornikkullu kingunerisassai

Siunnersuummut atasumik allaffissornikkut aningaasartuuteqassaq, taakkuli naatsorsuutigineqanngillat allaffimmiup ukiup ataatsip ingerlanerani piffissap affaani akissarsiai 250.000 koruuninik nalillit. Taakku saniatigut aningaasatigut allaffissornikkullu kingunissaqarsinnaavoq ilinniarfeqarfinnut, naatsorsuutigineqarsinnaamat, amerlanerit misilitseqqissasut siunnersuutip malitsigisaatut. Taakku aningaasartuutit annertunnginnissaat naatsorsuutigineqassaaq naatsorsuutigineqassallunilu ukiumut 100.000 koruunit qaangissanngikkaat.



Namminersorlutik inuussutissarsiuteqartunut aningaasatigut allaffissornikkullu kingunerisassai
Soqanngilaq

Innuttaasunut aningaasatigut allaffissornikkullu kingunerisassai
Innuttaasunut misilitsinnerminni angusaminnik pitsanngorsaannisamik kissaateqartunut siunnersuutip malitsigissavaa, taamaaliornissaminnut periarfissaqalernerat.